

Abrenuncia...3 gota pa dia... color di biento

Ernesto E. Rosentand

Un titulo straño. Boso n' ta haya?

Ma si bo sigui lesa, anto lo bo haya sa pakico e titulo aki. Ta un experiencia agradabel di por tene den bo man bukinan nobo na Papiamentu. Nan ta enriquece nos literatura. Un literatura jong cu poco poco ta creciendo. Y ta alentador di por tin den bo man obranan nobo.

Y ainda mas ora ta bukinan cu no ta trata temanan complica. Temanan cu no ta exige kibra bo cabes lesando nan. Nos ta prefera lectura unda cu lesando nos por distrae y/o diberti. Nos ta prefera temanan di tur dia trata hopi biaha di un manera humoristico, cu ta pone nos hari, y tin biaha sonrei pa e contenido. Nada complica. Y tur esaki den storianan cortico. Anto esaki ta e caso ora mi tabatin e tres bukinan di e escritor Juby Naar den mi mannan. Bukinan no mucho diki, y cu tipo di leternan hopi agradabel pa lesa. E diseño di e kaftnan - diseña pa Ronald, Ron, Wever - ta yama mes ora bo atencion y di biaha bo curiosidad pa bai lesa e contenido.

Boso lo puntra: Kico un buki di Juby Naar?

Anto mi a kere cu Juby ta skirbi solamente den Diario, articulonan cortico. O cu solamente ta enbolbi den carnaval y teatro. Ma cu e ta skirbi buki, esei mi no tabata sa. Lo bai ta reaccion di varios hende. Anto awe bo ta haya sa cu por ta otro.

Maske no ta prome buki cu el a skirbi. Podise bo no sa o bo no ta corda e buki cu el a skirbi relaciona cu su bario Lago Heights - "E di dos paraiso."

Awor Juby ta bin cu tres buki, completamente den otro estilo.

Abrenuncia
Tres gota pa dia

Color di biento

Algo remarcabel di e tres bukinan aki ta cu bo ta ripara claramente cu escritor a evolucionar den uso di idioma. Ma tambe den e manera di presenta su temanan. Maske mester bisa cu su estilo a keda mescos. Ta masha dificil trece cambio den un escritor di ta custumbra di skirbi di un manera specifico.

Juby su estilo ta: Hiba bo den un direccion, pa den esei abruptamente laga bo keda confronta cu algo cu bo no a spera. Como tambe percursa pa bo mes realisa ta na unda e kier bai.

Laga nos tira un bista riba e tres obranan aki.

ABRENUNCIA.

Storianan cortico cu ta trata sucesonan di tur dia. Experiencianan biba den pasado, como tambe den presente. Algun ta trata si creencianan cu nos pueblo tabatin temponan pasa, y cu lastimamente ta hayendo perdi.

Por ehempel cu spiritu ta sali y cu mester tene cuidou cu alma malo. Cachonan cu nan yoramento anochi ta spierta bo. Na e momentonan ei nan ta mirando spiritu. Y den otro di su storianan ta conta con tabata hinca miedo den muchanan cu den cuaresma no mester bai den mondi pasobra nan por topa cu e colebra cu pia.

Y cu den tempo di cuarema

mester tene bon na e reglanan di Iglesia pa di e manera ei tene e "buraco habri". Pues pa ora bo muri bai dera den santa catolico y no den chike.

Y esei ta pone nos corda cu den nos hubentud nan tabata bisa cu den cuaresma diabel ta los. Tabata spanta bo cu diabel y fierno. Esei awendia no por mas, pasobra mayoria di nos hobennan no ta kere ni den diabel ni den fierno. Nan no ta kere ni den nan mes.

Nos por lesa cu: Cuminda di cas "a bira Cuminda crioyo. O masha otro nombrenan extravagante cu segun nan ta bende mihó, manera Creole Dishes. Local food, Local dishes.

Nos por lesa den Abrenuncia e desarojo cu a tuma lugar den asunto di cushina. Prome tabata cushina riba piedra, despues a bin fogon, stof di kerosin, stof di gas o di coriente y awor microwave. Den labamento di paña tambe a bin cambianan positivo. Y asina nos por sigui conta boso e storianan den e buki aki. Ma mi ta prefera pa laga esaki pa boso mes haci.

TRES GOTA PA DIA

Den e buki aki nos ta lesa pasadan di bida di e escritor, cu nos por bisa ta pasadan casi mescos den hopi di nos hobennan. Su namoramento for di bewaarschool. Y con poco mas grandi e tabata cana pushi pushi tras di e galeinsnan ora di bai of bin di scol.

E temponan ei tabata otro cu awendia. Masha dificil pa topa cu e poyoyo. Ta control remote tabata namora. Experiencianan cu bo no ta

lubida henter bo bida. Y cu ta demostra cu tur caminda hubentud a evolucionar practicamente di mesun manera. No ta por nada ta papia di "Eterna Hubentud." E storia aki ta pone mi corda con cu masha hopi timides mi a skirbi mi prome carta di amor. Mi a sak'e di un buki Spaño: Cartas de amor. Palabranan nechi cu ni sa mi tabata sa nan nificacion. Ma ke carai! Mi a pensa esei lo haci bon impresion riba e galeins.

Yen di expectativa mi a warda su contesta. Y con grandi mi desilusion tabata ora mi a haya su contesta. E tabata uno masha cortico mes: "Pa contesta mira carta number 16". E galeins tabatin un buki mescos.

Pues lesando e storianan di den Tres gota pa dia, mi a rebiba tambe mi pasado. Aventuranan cu como mucha bo a biba. Y cu ta keda graba den bo ser. Y cu mi a purba pone riba papel den mi obra: Companashí.

Y mi ta kere cu esei tambe lo bai ta e caso cu esunnan cu bai lesa nan. Den e buki aki nos por lesa tambe di aventuranan amoroso fracasa. Ken no conoce esakinan?

COLOR DI BIENTO

Lesando Teatronan di cine mi a bin corda nos aventuranan na e lugaman aki. Na teatro Gloria. E teatro mas preferi di nos grupo. Nan tabata e tempo

e "rendez-vous" di hubentud. E pelicularnan mas popular tabata esunan di Cowboy. Mas pelea tin, mihó!

Maske hopi biaha bo no tabata mira película, ma bo tabata haci película cu e dams banda di bo sinta. Anto ora e película caba bo ta puntra e amigonan: "Bon, con a para cu a bandidonan?"

Hisamento di fli tabata e temponan ei un pasatempo masha conoci den hubentud. Tabata manda carta, corta liña di otro y pusta cua ta cana bai mas halto.

Lastima cu tur esaki a bai perdi den e hubentud di awendia. Awendia ta nintendo, computer y otro cosnan cu no ta yuda forma nos hubentud na nada. Al contrario!

Den e tres bukinan aki e escritor ta purba hiba nos den pasado pa di e manera aki rebiba un nostalgia pa temponan cu a pasa y cu desafortunadamente lo no bin bek. Ma rebibando esaki nos ta sinti nos bon, felis y sorpendi di realisa nos mes cuanto cos nos a pasa aden sin cu nos tabatin nocion di loke tabata pasando e momentonan ei.

Si bo lesa Tres gota pa dia, anto ora bo caba lo bo grita Abrenuncia y di e manera ei sin cu bo sa bo ta haya sa: Color di biento. Di e biento sano cu nos a conoce den nos pasado. Y cu de bes en cuando ta hiba nos bek na nos hubentud. Un tempo pa no lubida hamas.